



L'onestà? No la pare pi de moda!

Da quello che se sente e se lêze tuti i sacrosanti giorni – pur sforzàndose de no scandalizarse – a se ga l'inpression de vîvare t'on mondo... co na smanegà de coroti e de dionesti. Che la sia proprio cussi?

Che ghe sia on futio de coroti, corutori e dionesti, no se mete in dubio. E che le persone oneste no le faga ciasso, né notizia xe altrettanto vèro.

Raramente l'onestà la ga inpienà pagine de giornài e telegiornài, anca se la sageza popolare la ga sfornà sentenze che dise la verità e che oncò no pare pi de moda: **"Chi vive onestamente no more mai", "L'omo onesto se contenta de la so onestà", "L'onesto no ga paura né del ciaro, né del scuro", "Chi no se contenta de l'onesto, perde el mànegò e anca el resto"**.

Tute robe vère, ma che pare che le sia par pochi ingenui e anca poco pràtiche. El stesso poeta satirico Giovenale, del I sècolo dopo Cristo, el scriveva: **"L'onestà è lodata ma muore dal freddo"**.

Dopo vinti sècoli xe 'ncora vèro? In parte. Ai tenpi nostri se dise invece che el disonesto vol farte crédare che **"el Signore gera paron de la legna e el xe morto dal freddo"**.

Sarìa come dire che el furbo – parché el disonesto el se sente furbo e el se comporta da furbo – el vole farte crédare che tuto se basa so 'l trafujo, so l'inbrojo e so 'l **"dio danaro"**.

Vardando el nostro tenpo, no credo che ghe sia de pi o de manco dionestà de na volta: xe cambià la forma e xe cambià el sistema de farla savere in giro, magari sperando che el farabuto el se penta, dopo èssare stà scoperto e ficà in caponara.

Anca ne la nostra cara Italia, ogni tanto salta fora de quei malafari da spegazo: i vien ciamà giornalisticamente **"scàndali tributari, sugli appalti, giudiziari, dei rifiuti, della pedofilia, delle intercettazioni telefoniche, delle foto sui vip, a sfondo ses-**



La pi parte de la zente la xe onesta, anca se la xe silenziosa e quasi no te la vedi gnanca...

suale, a luci rosse, scandalo dei funerali, della Sanità, della Protezione civile, della fuga di notizie segretate dai Tribunali..." Ghe ne xe par tuti i gusti e tuto finisce co inchieste giudiziarie, processi, condane, preson par quei che xe stà catà... co le man ne la marmelata!

Le storie de coruzion le xe come i spàrasi de stajon, da rancurare ogni mattina. No te fè ora svejarte che te ghè pronta la coruzion nova de trinca... da mandar zo in pressia, par lassarghe el posto a la prossima che sarà 'ncora pi stuze ghina de st'altra.

El resto de le persone? El resto, che xe la magioranza e che vive distante da ste rogne de coruzion e de coroti, quasi quasi i finisce par sentirse de i fessi, persone che no xe stà bone de fare i so intaressi e che xe restà indriò... come la coa del maschio.

Ma, anca se el mondo el pare de i furbi, no la xe so mama: la virtù de l'onestà no la xe mai morta dal freddo, anzi la xe tegnù al riparo da la pi parte de la zente che tase e che fa el so dovere.

Disemo che ghe xe bisogno de separare "la zizania dal gran" e de darghe pi visibilità a la vita onesta e al ben che vien fato in silenzio e 'traverso el sacrificio.

Non col compromesso, co l'oportunismo o col goadagno personale e basta. La stessa crisi che ne ga colpìo, la pole èssare superà solo co un raporto de fiducia che viene da l'onestà.

Mèjo par tuti, dunque, se l'onestà la torna de moda.



Bona Pasqua a tuti i nostri Letori

